

**Xeernidaamiyaha La Socodka Dhaqdhaqaqa Isgaadhsinta
Xeer Nidaamiye Lr 01/2019 - 07/April/2019
*[Oo ku so baxay Faafinta Rasmiga ee Jamhuuriyadda Somaliland,
Cadadka 4aad ee 04 April 2019, Bogga 173 – 187]***

Wasiirka Wasaaradda Isgaadhsinta iyo Teknoolajiyadda JSL

ARAAR

- Markaan Arkay:** Qodobka 3aad faqradihiisa 13aad iyo 14aad ee Xeerka Boosaha iyo Isgaashsiinta Jamhuuriyadda Somaliland Xeer Lr, 50/2011; Kobaca iyo hormarka baaxadda leh ee Isgaadhsinta casriga ah oo ay hormood u yihiin Shirkaddaha Isgaadhsinta dalku;
- Markaan Arkay:** Waajibaadka wasaaraddu qaranka u hayso masuulkana uga tahay oo ah mid balaadhan una baahan in loo fuliyo si haboon;
- Markaan Tixgaliyay:** Muhiimadda ay leedahay bixinta cashuuraha ku waajibay Shirkaddaha Isgaadhsinta;
- Markaan Tixgaliyay:** Baahida loo qabo in la helo xeer-nidaamiye si haboon oo tifaftiran u faahfaahiya hawlaha la socodka dhaqdhaqaqa isgaadhsinta si aanay u baaqan cashuuraha ku waajibay adeegyada isgaadhsinta;

Sidaa Daraaddeed:

Waxaan halkan ku soo saaray **Xeer-Nidaamiyaha La Socodka Dhaqdhaqaqa Isgaadhsinta Dalka, Xeer Lr. 01/2019** oo ka kooban qodobadan soo socda;

Dr. CabdiWali Sh. Cabdillaahi Suufi Jibriil.

Wasiirka Wasaaradda Isgaadhsinta & Teknaloojiyadda.

07/April/2019

**CUTUBKA 1AAD
QODOBO GUUD**

**Qodobka 1aad
Magaca Xeer-nidaamiyahan**

Xeer-nidaamiyahan waxaa loogu yeedhayaa **Xeer-nidaamiyaha La Socodka Dhaqdhaqaqa Isgaadhsinta, Xeer-nidaamiye Lr 01/2019.**

**Qodobka 2aad
Erey Bixin**

Xeer-nidaamiyahan dhexdiisa erayadan soo socda waxa loola jeedaa:

- 1) **Adeeg Isgaadhsiineed:** Waxa loo la jeedaa adeeg kasta oo loo fidiyo macaamiisha iyada oo la adeegsanayo shebekadaha isgaadhsinta.

- 2) **Adeegyada Dheeraadka Ah (Value Added Service):** Waxa loo la jeedaa adeeg kasta oo ay bixiyaan ruqsadleyaashu marka laga reebo wicitaanada, internet-ka iyo farriimaha.
- 3) **Dhaqdhaqaqa Isgaadhsinta (Telecom Traffic):** Waxa loola jeedaa xaddiga adeegyada isgaadhsiineed ee ka dhex dhaca shebekadaha isgaadhsinta ee kala duwan.
- 4) **Wicitaanada Xatooyada ah (Fraud Calls):** Waxa loola jeedaa wicitaanada xatooyada ah ee aan ka diiwaan gashanayn ruqsadlayaasha.
- 5) **Habka La Socodka Dhaqdhaqaqyada Isgaadhsinta (Tele-Traffic Monitoring System):** Waxa loola jeedaa qalabka lagula soconayo xaddiga adeegyada isgaadhsiineed ee dhex mara shebekadaha isgaadhsinta.
- 6) **Isgaadhsin:** Waxa loola jeedaa, lalin, diris, ama helis calaamad, bilig, xog, qoraal, maqal iyo muuqaal ah oo dhex mara shebekadaha.
- 7) **Kaydiyaha Faahfaahinta Wicitaanka "CDR":** Waxa loola jeedaa warbixin la sameeyay iyada oo la adeegsanayo qalab isgaadhsiineed taasi oo koobsanaysa macluumaa ku saabsan dhacdo dhex martay shebekadaha isgaadhsinta.
- 8) **La Socod "Monitoring":** Waxa loo la jeedaa kormeerka dhaqdhaqaqa isgaadhsinta si loo hirgaliyo ujeedooyinka xeer-nidaamiyahan.
- 9) **Marin "Gateway":** Waxaa loo la jeedaa habka is-waydaarsiga xogta isgaadhsinta la diro ama la helo iyada oo lala soconayo dhaqaqaqyada isgaadhsinta.
- 10) **Ruqsadle:** Waxa loo la jeeda shirkad la siiyay ogolaansho ay ku bixin karto adeeg isgaadhsiineed si waafaqsan Xeerka Boosaha iyo Isgaadhsinta Somaliland.
- 11) **SIM (Subscriber Identity Module):** Waxa loo la jeedaa kaadh loo adeegsado aaladaha isgaadhsinta si loogu aqoonsado macmiilka.
- 12) **Shebakad Isgaadhsin:** Waxa loo la jeedaa habka loo gudbiyo ama la isku waydaarsado xogaha isgaadhsinta ee kala duwan.
- 13) **Shirkad Isgaadhsin:** Waxa loo la jeeda shirkad ganacsi oo la siiyay ruqsad u ogolanaysa in ay bulshada u fidiso adeeg isgaadhsiineed.
- 14) **Wasaarad:** Waxaa loola jeedaa Wasaaradda Isgaadhsinta iyo Teknoolajiyadda Somaliland.
- 15) **Wicitaanada Caalamiga ah (International Calls):** Waxa loo la jeedaa, Dhammaan dhaqdhaqaqyada isgaadhsiineed ee soo galaya ama ka baxaya dalka kuna suurto-galay xidhiidh ganacsi oo ka dhaxeeya shirkadaha dalka iyo kuwa caalamiga ah.
- 16) **Xaqijinta Dakhliga:** Waxa loola jeedaa qaababka lagu hubin karo dakhliga isgaadhsiineed ee ruqsadlah.
- 17) **Xeer:** Waxaa loola jeedaa Xeerka Boosaha iyo Isgaadhsinta Somaliland Xeer **Lr. 50/2011.**
- 18) **Xog "Data":** Waxa loola jeedaa caddaymaha, qoraalada iyo tilmaamaha uu sameeyo nidaam isgaadhsiineed.

Qodobka 3aad

Xadka Dabbqaadda Xeer-nidaamiyaha

Xeer-nidaamiyahan waxa lagu fulinayaa ruqsadlahaa bixiya adeegyo isgaadhsiineed iyadoo la tixraacayo Xeerka Boosaha iyo Isgaadhsinta Somaliland.

Qodobka 4aad

Ujeedooyinka Xeer-nidaamiyaha

Ujeedooyinka xeer-nidaamiyahan waxa ka mid ah:

1. In wasaaraddu ka hesho xogta ay uga baahan tahay shirkadaha haysta ruqsadaha isgaadhsinta dalka.
2. In la xaqijiyo ururinta iyo bixinta cashuurta ku waajibtay adeegyada ay bixiyaan shirkaddaha isgaadhsintu.
3. In la xoojiyo nidaamka wada shaqaynta wasaaradda iyo shirkadaha isgaadhsinta;
4. In la xoojiyo awoodda maamul ee wasaaradda.

CUTUBKA 2AAD
SHAQADA IYO WAAJIBAADKA WASAARADDA

Qodobka 5aad
Shaqada Wasaaradda

- 1) Wasaaaraddu waxay mas'uul ka tahay hirgalinta nidaam si hufan loogu kormeerayo isgaadhsinta dalka, nidaamkaas oo leh daah-furnaan iyo isla xisaabtan.
- 2) Si loo hirgaliyo masuuliyadda guud ee ku xusan faqradda 1aad ee qodobkan, Wasaaraddu waxay qabanaysaa shaqooyinkan soo socda;
 - a) Inay hirgaliso kana shaqaysiiso nidaam xaqijinaya ujeedooyinka xeer-nidaamiyahan.
 - b) In ay sahamiso goobta la dhigayo Nidaamka La Socodka Dhaqdhaqaaqa Isgaadhsinta iyadoo xaddidaysa talaabooyinka loo baahan yahay in la qaado iyo shuruudaha isku xidhka shabakadaha isgaadhsinta.
 - c) In ay diyaariso, rakibto, ka shaqeysiiso, dayactirto qalabka iyo cabbiraadda lagula socon karo dhaqdhaqaaqa isgaadhsinta ee ka dhex dhaca shabakadda ruqsadlaha.
 - d) In ay hubiso qaababka dhaqdhaqaaqa isgaadhsinta ee ruqsadleyaasha iyadoo u maraysa kormeerka marinada isgaadhsinta (gateway), nidaamka maamula biilasha iyo wicitaanada macmiilka.
 - e) In ay ka hor tagto isla markaana xakamayso xatooyada wicitaanada dibadda (Fruad International Calls).
 - f) In ay kormeerto ruqsadleyaasha si loo xaqijiyo fulinta xeerka boosaha iyo isgaadhsinta, wareegtooyinka iyo xeer-hoosaadyada la xidhiidha isgaadhsinta.
 - g) In ay ka dalban karto kana heli karto xogta ay uga baahan tahay ruqsadleyaasha si waafaqsan xeer-nidaamiyahan.
 - h) In ay hirgeliso nidaam lagu hubin karo cashuuraha ka soo xarooda adeegyada cashuurgalka ah ee isgaadhsinta ku waajibay si waafaqsan Xeerka Dakhliga Cashuuraha Barriga Somaliland Xeer Lr.72/2016.
 - i) In ay hirgaliso kana shaqaysiiso qalab suurto galinaya Hawlaha la Socodka Dhaqdhaqaaqa Isgaadhsinta Dalka.
 - j) Marka Wasaaraddu samaynayo kormeer si waafaqsan xeer-nidaamiyahan waxa goobjoog ka ahaanaya ruqsadleyaasha ama cid ay u igmadeen.

Qodobka 6aad

Masuuliyadda Wasaaradda ee Nidaamka La Socodka Dhaqdhaqaaqa Isgaadhsinta

- 1) Si ay u gudato waajibaadka ka saaran kormeerka adeegyada isgaadhsinta Wasaaradda Isgaadhsinta iyo Teknoolajiyaddu waxa ay:
 - a) Ka warhaynaysaa isbeddelka maalinlaha ah ee la xidhiidha dhaqdhaqaaqa adeegyada isgaadhsinta ee shebekadaha gudaha iyo kuwa caalamiga ah.
 - b) Adeegsanaysaa halbeegyo muujinaya tayada adeegyada macaamiishu helayaan.
 - c) La soconaysaa dhaqdhaqaaqyada isgaadhsinta ee xatooyada ah kuwaas oo dalka soo galaya ama ka baxaya.

- 2) Wasaaraddu waxa ay u igman-tahay ururinta xogaha ka yimaadda ruqsadleyaasha si waafaqsaan qodobka 3aad faqradiisa 14aad ee Xeerka Boosaha iyo Isgaadhsiinta JSL si ay u suurto gasho la socodka tayada adeegyada kala duwan iyo xaddiga dhaqdhaqaaq ee ka dhex dhaca shebakadaha isgaadhsiinta.
- 3) Wasaaraddu waa inay hubisaa in xogta laga helayo ruqsadlayaashu tahay:
 - a) Mid loo ururiyay qaab waafaqsan xeer-nidaamiyahan.
 - b) Mid sax ah oo aan waxba laga bedelin, laga reebin ama lagu darin.

Qodobka 7aad

Shaqada Qalabka La Socodka Dhaqdhaqaaqa Isgaadhsiinta

- 1) Iyadoo aanay wax u dhimayn tayada adeegga ruqsadlaha, qalabka la Socodka dhaqdhaqaaqa isgaadhsiintu waa inuu suurto geliyaa:
 - a) La socodka tayada adeegga isgaadhsiinta.
 - b) Diyaarinta tirakoob la xidhiidha dhaqdhaqaaqyada adeegyada kala duwan ee ka dhaca shabakadda ruqsadlaha.
 - c) Helidda faahfaahinta dhaqdhaqaaqa dhammaan adeegyada isgaadhsiinta.
 - d) Raadinta, helidda iyo xakamaynta wicitaanada iyo SIM-yada xatooyada ah.
 - e) Ururinta iyo kaydinta xogta la xidhiidha adeegyada isgaadhsiinta si waafaqsan qodobka 6aad, faqraddiisa 2aad ee xeer-nidaamiyahan.
 - f) Ogaanshaha tirakoobka dakhliga ee ruqsadlaha.

Qodobka 8aad

Ilaalinta Xogta

- 1) Wasaaradda waxa ku waajib ah in ay ilaaliso, xafiddo isla markaana kaydiso xogta dhaqdhaqaaqa isgaadhsiinta ee ay ka heshay ruqsadlayaasha.
- 2) Xogta dhaqdhaqaaqa Isgaadhsiinta ee Wasaaradu ku hesho si waafaqsan xeer-nidaamiyahan waxa loo tixgalinayaasir u gaar ah ruqsadlaha, waxaana masuul ka ah ilaalinteeda wasaaradda, waxaana reebban in sifo aan sharciga waafaqsanayn looga faa'iidaysto ama loogu gudbiyo dhinac sadexaad.
- 3) Hawlwadeen kasta oo ka tirsan shaqaalaha wasaaradda oo sifo aan sharci ahayn u bixiya ama u shaaciya xogta uu ku helay shaqada uu u hayo wasaaradda ee la socodka dhaqdhaqaaqa isgaadhsiinta, waxaa uu mutaysanayaa ciqaabta ku xusan Xeerka Ciqaabta ee la xidhiidha faldambiyeedka bixinta sirta.
- 4) Xogta dhaqdhaqaaqa isgaadhsiinta ee ku xusan qodobkan waxa lagu bixin karaa oo kaliya marka ay hay'ad garsoor oo awood u lihi ogolaato.

Qodobka 9aad

Cashuurta Adeegyada Isgaadhsiinta

1. Wasaaraddu waxay diyaarinaysaa bil kasta dhammaadkeeda qaansheeg caddaynaysa dakhliga ka soo xarooday cashuurta GST-ga ah ee ay ka urururiyeen shirkadaha isgaadhsiintu macamiishooda qaab waafaqsan qodobka 164aad ee Xeerka Dakhliga Cashuuraha Berriga.
2. Wasaaraddu waxa ay diyaarinaysaa bil kasta dhammaadkeeda qaansheeg caddaynaysa dakhliga ku waajibay adeegyada cashuur galka ah ee ay ruqsadlayaashu u fidiyeyen macamiishooda.
3. Wasaaraddu waxa ay diyaarinaysaa dhammaadka sannad kasta qaansheeg caddaynaysa cashuurta ku waajibtay dakhliga sanadlaha ah ee ruqsadlayaasha.

4. Qaansheegta adeeg-yada cashuur-galka ah ee ay Wasaaraddu diyaarinayso bilkasta dhammaadkeeda waxay ku salaynaysa arrimahan:
 - a) Tirada daqiqadaha wicitaanada gudaha iyo debeedda.
 - b) Xaddiga internetka la isticmaalay.
 - c) Xaddiga lacagta ku shubashada ama biilka macmiilka loo dallacay.
 - d) Adeegyada farriimaha ee kala duwan.
 - e) Adeegyada dheeraadka ah ee isgaadhsinta (Value Added Services).
5. Wasaaraddu qaansheegta ay diyaarisay waxa ay la wadaagaysaa Wasaaradda Horumarinta Maaliyadda.
6. Ruqsadluhu haddii uu ku qanci waayo qaansheegta loo gudbiyay waxa uu ku wargalinayaas Wasaaradda muddo shan maalmood gudahood ah.
7. Wasaaradu marka ay hesho wargelinta cabashada ee ruqsadlaha, waa in ay ku xalisaa muddo todoba maalmood gudohood ah, kuna wargelisaa Wasaaradda Horumarinta Maaliyada natijada cabashada ee ruqsadlaha.

CUTUBKA 3AAD
WAAJIBAADKA RUQSADLEYAASHA

Qodobka 10aad

Masuuliyadda Ruqsadlaha ee Nidaamka La Socodka Dhaqdhaqaqa Isgaadhsinta

1. Si loo la socdo dhaqdhaqaqa isgaadhsinta, ruqsadluhu waa inuu:
 - a) U soo gudbiyaa wasaaradda dhammaan xogta looga baahdo iyada oo aan waxba laga baddalin, laga reebin ama lagu darin.
 - b) U ogoladaa wasaaradda ama cid kasta oo ay u soo igmatay inuu ku rakibo ama dayac tiro qalab loogu talo galay in lagu xidho shebekedda ruqsadlaha.
 - c) Kala shaqeeyaa wasaaradda isagoo siinaya goob ku habboon kana caawiyo in lagu rakibo qalabka la socodka marka looga baahdo.
 - d) U fududeeyaa rakibaadda qalabka isku-xidhka (lalinta) ee u dhaxeeya nidaamka ruqsadlaha iyo ka Wasaaradda, isagoo xogta la xidhiidha isku xidhka ku soo gudbinaya muddo todoba maalmood gudahooda ah ka dib marka uu ka helo qoraal Wasaaradda.

Qodobka 11aad
Waajibaadka Bixinta Macluumaadka

1. Ruqsadle kasta waa inuu u gudbiyaa Wasaaradda Isgaadhsinta iyo Teknaloojiyadda qodobadan:
 - a) Kaydiyaha Faahfaahinta Wicitaanada (CDR) ee dhammaan dhaqdhaqaqyada isgaadhsinta, uguna soo gudbiyaan qaabka iyo mudada ay wasaaraddu u astayso.
 - b) Xisaab-xidhada ay soo diraan shirkadaha caalamiga ah ee dhaqdhaqaqyada isgaadhsinta ku soo xidha ruqsadlayaasha Somaliland ama qaansheegta loo diro shirkadaha caalamiga ah.
 - c) Tirada daqiqadaha iyo dakhliga dhaqdhaqaqyada isgaadhsinta ee ka dhaca shebekadaha ruqsadlayaasha dalka gudihiisa iyo shirkadaha caalamiga ah ee heshiiska kula jira kuwa Somaliland.
 - d) Macluumaad kasta oo lagama maarmaan ah oo la xadhiidha shabakadda ruqsadleha ee bixinta adeegyada isgaadhsinta iyo heshiisyada ay la wadaagaan shirkadaha kale.

2. Caddaynta dakhliga ee ku xusan xeer-nidaamiyahan waa in loo gudbiyaa Wasaaradda mudddo aan ka dambayn maalinta saddexaad ee bil kasta.

Qodobka 12aad

Xogta Bilitga (Signaling data)

1. Ruqsadluhu waa in uu kaydiyo xogaha isku xidhka ee loo yaqaan bilitga (signaling data) ee laga maarmaanka u ah maaraynta dhaqdhaqaaqyada Isgaadhsiinta.
2. Xogta bilitga si waafaqsan faqradda 1aad waa inay isugu jirtaa halka ay ka timid, halka ay ku socota, warbixinta adeega, wakhtiga iyo qaabka isgaadhsiinta la isugu gudbiyay.
3. Ruqsadluhu waa in uu markasta Wasaaradda ku wargeliyaa ka hor inta aanu samayn isbeddel ama casriyeyn habka bilitga taas oo wadata wakhtiyadeeda oo faahfaasan isla markaana la jaan qaadi karta qalabka La Socodka Dhaqdhaqaaqa Isgaadhsiintu in uu si fiican u shaqeeyo.

Qodobka 13aad

Rakibidda Qalabka iyo Ilaalintooda

1. Haddii loo baahdo in qalab la dhigo xarumaha ruqsadlayaasha Wasaaraddu waxa ay heshiis la geli doontaa ruqsadlaha kaas oo qeexaya maaraynta, ka-shaqaysiinta iyo dayac-tirka qalabkaas.
2. Haddii loo baahdo, goobaha ay qalabku ku rakibanyihiin ee shebekadaha ruqsadleyaasha, ruqsadleyaashu waa in ay daryeelaan isla markaana ilaaliyaan ammaanka qalabka.
3. Haddii qalab lagu rakibay xarumaha ruqsadlaha si xeer-nidaamiyahan waafaqsan uu soo gaadho burbur, dhaawacyo ama wax-yeello, heshiiska ku xusan faqradda 1aad ayaa lagu qeexayaa wixii ka waajibaya.

Qodobka 14aad

Maaraynta Goobaha la Wadaago

1. Wasaaradda ayaa go'aaminaysa hannaanka la xidhiidha gelitaanka, kormeerka, ka shaqaysiinta iyo dayac-tirka ee goobaha la wadaago iyada oo la socodsinaysa ruqsadlaha si waafaqsan xeer-nidaamiyahan.
2. Haddii ay cillad farsamo ka dhacdo goobaha la wadaago xilliga lagu guda jiro rakibaadda, dayac-tirka, baddalaadda ama kormeerka, waxa lala socodsinayaan Wasaaradda iyo ruqsadlaha ama cidda ay u igmadaan.
3. Wasaaradda iyo ruqsadluhu waa in ay ku wacyi-geliyaan oo ay hubiyaan in shaqaalahoodu ay ilaaliyaan una hoggaansamaan nidaamka loogu talagalay ammaanka, marka ay dayactirayaan ama rakibayaan qalabka.

CUTUBKA 4AAD:

GUDIGA FARSAMO EE HIRGALINTA XEER-NIDAAMIYAHAN

Qodobka 15aad

Abuurista Guddi Farsamo

1. Si loo fuliyo waajibadyada iyo shaqooyinka ku xusan xeer-nidaamiyahan, Wasiirku waxaa uu magacaabi doonaa guddi farsamo oo ka kala socda dhinacyadan hoos ku xusan:
 - a) Wasaaradda Isgaadhsiinta iyo Teknoolajiyadda, laba xubnood.
 - b) Wasaaradda Horumarinta Maaliyadda, laba xubnood.

- c) Shirkad kasta oo haysata ruqsad isgaadhsiineed, hal xubin.
 - d) Xubnaha gudiga farsamo ee aan ahayn kuwa ka socda Wasaaradda Isgaadhsiinta Iyo Teknoolajiyadda, waxa soo xulaya maamulka hay'adda ama shirkadda ay ka tirsan yihiin kadib marka uu codsi ka helo Wasiirka.
2. Shaqada iyo masuuliyada gudiga farsamo waxa ka mid ah;
 - a) Inay fududeyaan ka shaqaysiinta Qalabka La Socodka Dhaqdhaqaaqa Isgaadhsiinta.
 - b) Inay xalliyaan cilladaha farsamo ee ku yimaadda Qalabka La Socodka Dhaqdhaqaaqa Isgaadhsiinta.
 - c) Inay dardar galiiyan wada-shaqaynta farsamo ee ka dhaxaysa Wasaaradda iyo ruqsadlayaasha.
 3. Wasaaradda ayaa diyaarinaysa habka maamulka iyo anshaxa ee ay ku shaqayn doonaan xubnaha gudigan farsamo.

**CUTUBKA 5AAD
GABAGABO**

**Qodobka 16aad
Kaabista iyo Wax-bedelka Xeer-nidaamiyahan**

1. Xeer-nidaamiyahan waxa lagu samayn karaa wax-ka-beddel iyo kaabis wakhtiga loo baahdo.
2. Wasaaradda Isgaadhsiinta iyo Teknaloojiyadda ayaa leh awoodda wax-ka-beddelka iyo kaabista xeer-nidaamiyahan.

**Qodobka 17aad
Dhaqangalka Xeer-nidaamiyahan**

Xeer-nidaamiyahan waxa uu si rasmi ah u dhaqan geleya isla maalinta uu saxeexo Wasiirka Wasaaradda Isgaadhsiinta iyo Teknaloojiyadda laguna soo saaro faafinta rasmiga ah.

**WASIIRKA WASAARADDA ISGAADHSIINTA IYO TEKNOOLAJIYADDA JSL
07/April/2019**